



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LESIBILI (P2)

LWETI 2012

EMAMAKI: 80

SIKHATSI: 2½ ema-awa

Leliphepha linemakhasi la-21.

TICONDZISO KULABAHLOLWAKO

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimpawu kuphela bese ukhetsa leyo lofuna kuphendvula yona.
3. Liphepha lemibuto licuketse TIGABA LETINTSATFU:

SIGABA A:	Tinkondlo	(30)
SIGABA B:	Inoveli	(25)
SIGABA C:	Umdlao	(25)
4. ISIHLANU IMIBUTO lefanele uyiphendvule seiyonkhe: ESIGABENI A imibuto mitsatfu (3), ESIGABENI B munye (1), ESIGABENI C munye (1) ngalendlela:

SIGABA A: TINKONDLO

Phendvula imibuto ibe mibili yeTINKONDLO LETIFUNDVWE EKLASINI.
Phendvula umbuto munye ETINKONDLWENI LETINGAKAFUNDVWA EKLASINI.

SIGABA B: INOVELI

Phendvula umbuto ube munye.

SIGABA C: UMDLALO

Phendvula umbuto ube munye.
5. KUKHETFWA KWETIMPHENDVULO TESIGABA B (INOVELI) NESIGABA C (UMDLALO)
 - Phendvula KUPHELA imibuto yenoveli loyifundzile kanye nemdlalo lowufundzile.
 - Phendvula UMBUTO MUNYE WENDZABAMBHALO KANYE NAMUNYE UMBUTO EMIBUTWENI LEMIFISHA. Uma ukhetse kuphendvula umbuto wendzabambhalo ESIGABENI B, uphokelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphokelekile kutsi uphendvule umbuto wendzabambhalo ESIGABENI C.
Sebentisa luhlu lwekutikhumbuta kute usitakale.
6. BUDZE BETIMPHENDVULO
 - Imibuto yendzabambhalo etinkondlweni kufanele iphendvulwe ngemagama la-190–240.
 - Indzabambhalo yenoveli nemdlalo kufanele iphendvulwe ngemagama la-340–390.
 - Budze betimphendvulo temibuto lemifisha bufanele buhambisane nelinani lemamaki labekiwe. Labahlolwako kufanele banganhlanhlatsi.

7. Fundzisisa kahle ticondziso letisekucaleni kwaleso naleso sigaba.
8. Tinombolo tetimphendvulo atihambisane naleto temibuto njengobe tinjalo ephepheni lemibuto.
9. Cala LESO NALESO sigaba ekhasini LELISHA.
10. Bhala ngesandla lesibonakalako nalesifundzekako.
11. Siphakamiso sekulawulwa kwesikhatsi:

SIGABA A: Lokungenani emaminithi la-40
SIGABA B: Lokungenani emaminithi la-55
SIGABA C: Lokungenani emaminithi la-55

LIKHASI LALOKUCUKETFWE

Lelikhasi litawusita bahlolwa kutsi bakwati kukhetsa imibuto labafuna kuyiphendvula ngaphandle kwekufundza lonkhe liphepha lemibuto.

SIGABA A: TINKONDLO		
Tinkondlo Letimisiwe: Phendvula nobe nguYIPHI imibuto LEMIBILI		
INOMBOLO YEMBUTO	UMBUTO	LIKHASI
1 'Aphe' Emagugu'	Umbuto loyindzabambhalo	6
NOBE		
2 'Yinakekele'	Imibuto lemifisha	7
NOBE		
3 'Intfutwane'	Imibuto lemifisha	8
NOBE		
4 'Iwil' Insika'	Imibuto lemifisha	10
NA		
Inkondlo lengakafundvwa eklasini: Phendvula nobe ngumuphi umbuto ube MUNYE.		
5 'Kuya Ngani?'	Umbuto loyindzabambhalo	11
NOBE		
6 'Kuya Ngani?'	Imibuto lemifisha	12
SIGABA B: INOVELI		
Phendvula umbuto MUNYE.		
7 <i>Liphume Nebovu</i>	Umbuto loyindzabambhalo	13
NOBE		
8 <i>Liphume Nebovu</i>	Imibuto lemifisha	13
NOBE		
9 <i>Kubamba Letingelako</i>	Umbuto loyindzabambhalo	15
NOBE		
10 <i>Kubamba Letingelako</i>	Imibuto lemifisha	15
SIGABA C: UMDLALO		
Phendvula umbuto MUNYE.		
11 <i>Kwahlwa Emini</i>	Umbuto loyindzabambhalo	17
NOBE		
12 <i>Kwahlwa Emini</i>	Imibuto lemifisha	17
NOBE		
13 <i>Umvuzo</i>	Umbuto loyindzabambhalo	19
NOBE		
14 <i>Umvuzo</i>	Imibuto lemifisha	20–22

CAPHELA: Esigabeni B na-C, phendvula YINYE INDZABAMBHALO naMUNYE umbuto WEMIBUTO LEMIFISHA.

LUHLA LWEKUTIKHUMBUTA

Lelikhasi litawusita bahlolwa ekukhetseni imibuto labafuna kuyiphendvula ngaphandle kwekufundza lonkhe leliphapha lemibuto.

	TINOMBOLO TEMIBUTO	LINANI LEMIBUTO LEPHENDVULWAKO	TICK
A: Tinkondlo (Tinkondlo letifundvwe eklassini)	1–4	2	
A: Tinkondlo (Inkondlo lengakafundvwa eklassini)	5–6	1	
B: Inoveli (Indzabambhalo nobe imibuto lemifisha)	7–10	1	
C: Umdlalo (Indzabambhalo nobe imibuto lemifisha)	11–14	1	
CAPHELA: Esigabeni B na-C, phendvula YINYE INDZABAMBHALO NAMUNYE umbuto WEMIBUTO LEMIFISHA.			

SIGABA A: TINKONDLO**TINKONDLO LETIFUNDVWE EKLASINI**

Khetsa tinkondlo tibe TIMBILI kuleti letilandzelako uphendvule ngato imibuto letawulandzela.

UMBUTO 1

Fundza lenkondlo lelandzelako bese uphendvula imibuto letawulandzela.

APH' EMAGUGU – MS Magagula

- 1 Ngiyakhala nangicabang' emagugu
- 2 Emagugu emvelo phas' etibilini temhlaba
- 3 Temhlaba welive laMswati.
- 4 Iph' igolide nesiliva kaNgwane?
- 5 Sekwasal' imigedze lengemakhay' etimamba,
- 6 Kwasala tindvundvum' emanyela engcebo,
- 7 Labayigubha baphangelana baphangi,
- 8 Yetfwalwa tinkhayiman' idzabula tilwandle.
- 9 Sekwasal' iMphaka yemigodzi yemalahle,
- 10 Lolumnyama lutfuli lubhunya luy' etulu,
- 11 Lumbony' Emaswati atfungats' umnotfo,
- 12 Insimbi bayimbil' eNgwenya bayivukuta,
- 13 Kwatsiw' akayigobi Ngwan' igotjw' eJalimane,
- 14 Engwenya yasal' imigodzi' ikhamisile.
- 15 Ebulembu bulembu batsandzel' imigodzi,
- 16 Litje-boya balivukute balicedza,
- 17 Lihlehletela ngeluthaka liy' eBhabtini.
- 18 KaDvokolwako idayiman' itfolakele
- 19 Balel' etikwayo beMatfombeni bayilondzile.
- 20 Wo sesuka sililo sendvulo!
- 21 Emanceba laphola, kuvuswa kabusha,
- 22 Bagujwa bakhweshiswa bangcwatjwa
- 23 Imfakabili nembala nay' ikhona,
- 24 Tingedzama tawubuk' umnotf' usitsela,
- 25 Tindvundvuma telite taphakama tahawukisa.
- 26 Kuyoba kuhle kuwe Ngwane,
- 27 Sitivukuta tibilini temhlaba,
- 28 Siwakhiph'emagugu siwasakata,
- 29 Lapho bakusasa sebasibut' emagugu,
- 30 Sibanik' imphendvulo yetibiyo telive,
- 31 Timile titinsika temaswati,
- 32 Tingemagugu laphum' etibilini
- 33 Temhlaba siwuvukuta sifun'ingcebo.

Bhala indzatjanambhalo lapho uveta khona umcondvo lojulile lowetfulwa ngulenkondlo lengenhla. Budze bemphephndvulo yakho abube ngemagama langabi ngaphasi kwala-190 kodvwa angabi ngetulu kwala-240.

[10]**NOBE**

UMBUTO 2

Fundza lenkondlo lelandzelako bese uphendvula imibuto letawulandzela.

YINAKEKELE – SR Mdluli

- 1 Libibi letibi ngiletaye,
- 2 Libibi lelimbonya umhlaba libe yintsaba
- 3 Libibi lelimbonya tjani libe yindvundvuma
- 4 Kepha ngekuhamba kwesikhatsi litawehla
- 5 Ngakhula ngalibona lehla libola embikwami
- 6 Ngilibona lehla liphela etaleni
- 7 Ngiyati libibi liyabola liphele
- 8 Kepha leli angilati liyangicaka.
- 9 Libibi letikotela nemabhodlela
- 10 Intsabakati levimba ungaboni ngale
- 11 Ikhukhumuka imihla nemalanga
- 12 Tjani lobungephasi kwayo sebubovana
- 13 Tjani buyabonakala budla lite
- 14 Tjani lobungephasi kwayo abusalati lilanga
- 15 Imphela bukhala abucedzi ngekucindzetelwa
- 16 Kantsi uyenyanyani umuntfu imvelo?
- 17 Phela sekuyakhanya iyatondvwa imvelo
- 18 Imphela akwatiwa yona ngaliphi imvelo
- 19 Emabibi etibi emataleni nasemigwacweni
- 20 Intfutfu ibhunya emishinini nasemafemini
- 21 Iyodvwa lebhunya ilandzele timoto netitimela
- 22 Imifula iluhlata butsi lobubuya emishinini
- 23 Kunatsa emanti alemifula kutiloya emitimbeni
- 24 Kulavuka emalangabi etikhotseni nasemahlatsini
- 25 Kutse vekelele emabhodlela netikotela eveni
- 26 Kundiza emapulasitiki lamibalabala eveni
- 27 Kuphephetela emaphepha emibala yonkhana
- 28 Tihlahla tishe tangcongca kwaphela emahlatsi
- 29 Kantsi kwentekani ngemuntfu eveni nemvelo?
- 30 Yebo umlilo uyawashisa emaphepha
- 31 Kanjalo tiyasha netihlahla tiphele
- 32 Kantsi nabo tjani buyasha buphele
- 33 Umlingo wemlilo ucedze imvelo netibi
- 34 Kepha tikotela netinsimbi akushi kuphele
- 35 Kuphela umlilo kujame libibi letibi
- 36 Hhayi bo yimvelo yakho lena!
- 37 Lena yimvelo yakho nami.
- 38 Lena yimvelo yesitukulwane sakho nesami.
- 39 Yinakekele!
- 40 Yonge!

2.1 Bunkondlo buni lobusetjentisiwe emigceni 1 na-2 endzimeni yekucala?

(1)

- 2.2 Sinongo sini senkhulumo lesivetwa ngulomugca wenkondlo lolandzelako?
Imphela bukhala abucedzi ngekucindzetelwa (1)
- 2.3 Yini lebangela sonkondlo asebentise loluphawu ! emgceci 39 na-40? (1)
- 2.4 Ucondzeni sonkondlo nakatsi:
Ikhukhumuka imihla nemalanga (1)
- 2.5 Phawula ngemaphuzu lamabili ngephethini yalenkondlo ubhekise kulemigca lolandzelako:
Lena yimvelo yakho nami.
Lena yimvelo yesitukulwane sakho nesami.
Yinakekele!
Yonge! (2)
- 2.6 Phawula ngekubumbana kwesihloko salenkondlo nengcikitsi yayo. (2)
- 2.7 Tetsamelilwati talenkondlo tifundzani ngaloko lokushiwo ngulenkondlo lengenhla? Chaza. (2)
- [10]**

NOBE**UMBUTO 3**

Fundza lenkondlo lolandzelako bese uphendvula imibuto letawulandzela.

INTFUTFWANE – MJ Thwala

- 1 Yati tilimela temnyaka
- 2 Njengentfutfwane letatiko,
- 3 Leyati kutsi kunebusika nelihlobo,
- 4 Nekutsi kunekwindla nentfwasahlobo.
- 5 Yati kutsi sikhatsi siyahamba,
- 6 Lokuhle kulandzele lokubi
- 7 Nalokubi kulandzele lokuhle,
- 8 Konkhe kuhamba njengesikhatsi.
- 9 Ngente ngibe njengentfutfwane
- 10 Leyati sikhatsi ingenawashi,
- 11 Leyati teliv'ingenabalave,
- 12 Leyat 'imphil' ingafundziswa.
- 13 Ngente ngibe njengentfutfwane,
- 14 Ngisebente sikhatsi sisekhona,
- 15 Ngicabange sikhatsi lesitako
- 16 Lesimatim' emphilweni yami.

17	Ngente ngibe njengentfutfwane,
18	Ngisebente kamatima ngikhohlwe
19	Telive letihlasimulis' umtimba,
20	Tingente ngiphefumule kamatima.
21	Ngente ngiphile njengentfutfwane,
22	Lenelikhaya lekuphephela nasekubhoke
23	Emakhata nemimoya yebusika,
24	Netimvula letin' ehlobo.

- 3.1 Ngekubona kwakho ikhuluma ngani lenkondlo ngalokusobala? Chaza ngeliphuzu linye. (1)
- 3.2 Khokha munye umugca wenkondlo lonekucatsanisa kwemcondvo lophikako uwubhale phasi bese udwebela lamagama lanekucatsanisa (1)
- 3.3 Bunkondlo buni lobuvela ngulemigca lelandzelako?
Yati tilimela temnyaka
Njengentfutfwane letatiko, (Imigca 1–2) (1)
- 3.4 Khokha imigca yenkondlo leneluchumanosiphambano uyibhale phasi bese udwebela loluchumano. (1)
- 3.5 Khokha umugca loyimphindvwa kulenkondlo bese usho inhloso yasonkondlo yekuyisebentisa. (2)
- 3.6 Ngabe sonkondlo uphumelele kangakanani kusebentisa sinongo sesifaniso kulenkondlo yakhe? Chaza. (2)
- 3.7 Ngumuphi umlayeto sonkondlo lawendlulisela etetsamelinilwati ngalenkondlo? Sekela. (2)
- [10]**

NOBE

UMBUTO 4

Fundza lenkondlo lelandzelako bese uphendvula imibuto letawulandzela.

IWIL' INSIKA – JJ Thwala

- 1 Yeka leto tikhatsi
- 2 Letendlula letingenawuphindze tibuye:
- 3 Tendlulise kwemanti lageletako
- 4 Tendlulise kwemphilo yesotsamlilo
- 5 Lenemabanga lamafisha njalo
- 6 Lendlul' ingab' isakhonjwa ndzawo.
- 7 O! nkhosikati yelikhaya,
- 8 Bekukuhl' usime ngensika,
- 9 Bekukuhl' unemtfunti wekukhosela,
- 10 Kubuhlungu kuyashacisa namuhla,
- 11 Sililo setinyembeti sodvwana.
- 12 Yebo-ke, awehl' umoya...
- 13 Insika lebeyimise likhaya
- 14 Kusukela kwatsi nhlo,
- 15 Idliwe ngumuhlwa yawa,
- 16 Kayiphindz' ivuke nanini.
- 17 Kuyobuye kulunge, cola...
- 18 Nob' emanceb' opha,
- 19 Nobe tilondza tibhibha,
- 20 Nom' iminjunju ifutsa,
- 21 Kulukhuni kulitje kuwe,
- 22 Cola ... cola ... cola ...
- 23 Bukhulu nebucotfo bakho,
- 24 Umusa nesimilo sakho,
- 25 Kuyawufakw' emehlo tedzeleli,
- 26 Tikuchukulute nom' usemantini
- 27 Ngob' ungasenansika lekumisile.
- 28 Emehlwen' akho kuyakwakheka
- 29 Emachaphoti lachucha tinyembeti,
- 30 Buso bakho lobubusheleleti
- 31 Buvele tishla letingahhudluleki,
- 32 Boph' inhlitiyo ngamabopha.
- 33 Bamb' inhlitiyo uyibambisise
- 34 Landzel 'umgudvu lofanele,
- 35 Tifanise nalabanye bantfu.
- 36 Kwemhlaba kuyendlula Mntfwanebantfu,
- 37 Lokwentekile kuyafana nalokwadalwa.

- 4.1 Kunemugca lapha kulenkondlo locuketse imphindza. Wukhokhe uwubhale phasi.

- 4.2 Bunkondlo buni lobusemgceni 17 wenkondlo lengenhla? (1)
- 4.3 Khokha umugca wenkondlo lapho imbongi isebentise khona sifanangwaca bese udvwebela lesifanangwaca. (1)
- 4.4 Kusuke kwente njani uma umuntfu asemantini njengoba kushiwo kulenkondlo? (1)
- 4.5 Bhala umoya lotfolakala kulenkondlo lengenhla bese ucaphuna munye umugca lowesekela imphendvulo yakho. (2)
- 4.6 Lomugca wenkondlo lolandzelako uhambisana kangakanani nengcikitsi yalenkondlo? (2)
- Tendlulise kwemanti lageletako. (2)
- 4.7 Sonkondlo ulisebentise kahle leligama lelitsi 'insika'. Sekela lombono ubhekise enkondlweni (2)
- [10]**

NA

TINKONDLO LETINGAKAFUNDVWA EKLASINI

Phendvula **MUNYE** umbuto kulena lelandzelako.

UMBUTO 5

Fundza lenkondlo lelandzelako bese uphendvula imibuto letawulandzela.

KUYA NGANI – JBC Lumphoko

- 1 Sengibute kanyentyentyenti mnaketfu,
- 2 Kodvwa imphendvulo kayitfolakali.
- 3 Sengitibut' inhlok' ayitsatsi kahle mnaketfu,
- 4 Ngitibuta umbuto lomphendvulo kayitfolakali;
- 5 Kuya ngani?
- 6 Kuya ngani kantsi mnaketfu?
- 7 Tincabakati tetincabakati tiyabhidlika,
- 8 Emadvwalakati nemawakati nako kuyahhihlika!
- 9 Konkhe lokukhona nako kugcina kuphela;
- 10 Pho mine – ke, kuya ngani?
- 11 Ngitakhile tincabakati ngetemisimbisi,
- 12 Ngatisimbisela etulu naphasi,
- 13 Ngatingwalima etindvongeni ngetesitsatsatsa,
- 14 Konkhe ngikwembele kulelikhulukati lidwala;
- 15 Pho kimi – ke kuya ngani?

- | | |
|----|--|
| 16 | Ngabe ngubani lomcoboshisisi wemtsakatsi |
| 17 | Lonyikinye letibhonga talesiphephelo? |
| 18 | Kute sitfukutfuku senja siphelel' eboyeni, |
| 19 | Netinhlanga nato tiphephuk' emoyeni? |
| 20 | Ecinisweni lonkhe kuya ngani? |
| 21 | Kuya ngani phela mkhulu? |
| 22 | Lukhulu lengilibona lapha, |
| 23 | Ngiyawuhamba ngite ngibe kuphi? |
| 24 | Ngiyitfukuse kuph' inhloko kute kube nini? |
| 25 | Nebakitsi, kuya ngani? |
| 26 | Igadze idziniwe! |
| 27 | Kumnyam' eZembeni Makhasane! |
| 28 | Ngubani loyakungiphendvulela? |
| 29 | Nangabe imphendvulo kayikho kantsi |
| 30 | Pho, kuya ngani? |

Bhala indzatjanambhalo ngalokushiwo yinkondlo ngalokusobala.

Budze bemphephendvulo yakho abube ngemagama langabi ngaphasi kweli-190 kodvwa kungabi ngetulu kwala-240.

[10]

NOBE

UMBUTO 6

Fundza futsi lenkondlo lesembutweni 5 bese uphendvula imibuto lelandzelako.

- 6.1 Bunkondlo buni lobuvela ngulamagama ladvwetjelwe kulemigca yenkondlo lelandzelako:

Ngitakhile tincabakati ngetemisimbisi,
Ngatisimbisela etulu naphasi,

(1)

- 6.2 Endzimeni yesine kunemvumelwanosigcino. Bhala lemigca lenalemvumelwano bese uyayidwebela.

(1)

- 6.3 Uchazani sonkondlo ngalomugca wenkondlo lolandzelako?

Lonyikinye letibhonga talesiphephelo?

(1)

- 6.4 Khokha umugca wenkondlo lonemvumelwamomaphakatsi uwubhale phasi bese udwebela lemvumelwano.

(1)

- 6.5 Phawula ngekusetjentiswa kwaloluphawu ? ngekwebunkondlo kulenkondlo lengenhla bese usho nesizatfu lesenta sonkondlo alusebentise.

(2)

- 6.6 Ngabe sonkondlo usikhetse ngemphumelelo yini lesaga lesidvwetjelwe kulomusho lolandzelako lokulenkondlo lengenhla? Sekela imphendvulo yakho.

Kute sitfukutfuku senja siphelel' eboyeni.

(2)

- 6.7 Ucondzeni sonkondlo ngekusebentisa -kati emigceni 7, 8 na-11.

(2)

[10]

SAMBA SESIGABA A: 30

SIGABA B: INOVELI

Kulesigaba kunemanoveli lamabili. Wena-ke khetsa ibe YINYE loyifundze eklasini lonyaka uphendvule ngayo.

CAPHELA:

Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli loyifundzile. Kumele uphendvule nobe ngumuphi umbuto ube MUNYE *ngaleyo noveli loyifundzile*. Uma ukhetsa kuphendvula umbuto wendzabambhalo kulesigaba, uphokelelekile kutsi ESIGABENI C uphendvule imibuto lemifisha.

UMBUTO 7: LIPHUME NEBOVU – BB Malangwane

Bhala indzabambhalo ngekutselelana emanti kwetigameko letilandzelako talenoveli ekutfufukeni kwendzaba.

- Indlela Lushawulo lesuka ngayo eMankayane.
- Mhla LaMagagula ayewubikela belisontfo kutsi yena sewuyashiya lapha kaKhumalo ngenca yenhlupheko layikhonjwa nguLushawulo.
- Kufa kwebantfwana baLushawulo.
- Kuboshwa kwaLushawulo.
- Lusuku lwekuya emkhayeni.

Indzabambhalo yakho ayesekelwe ngekucaphuna enovelini.

Indzabambhalo yakho ayibe nemagama langabi ngaphasi kwe-340 kodvwa angabi ngetulu kwe-390.

[25]**NOBE****UMBUTO 8: IMIBUTO LEMIFISHA****LIPHUME NEBOVU – BB Malangwane**

Fundza letheksthi leyincenye yendzaba bese uphendvula imibuto letawulandzela.

Cha lutsandvo lwakho lukhulu-ke kulomfati wakho. Sewungaze udzele nebantfwabakho.' Angete ayiphendvula leyo Lushawulo, evakale asatsi, 'Asambe phela uyobabingelela bangaze bacabange kutsi befike ebantfwini bambe.'

'Uyabona, sewukhohliwe kutsi mine ngagana wena nje kuphela. Angati-ke kutsi lomunye ngabe uhlushwa yini ngami, mine kona ngihlushwe yini ngaye. Futsi nanyalo kutsi ngitsatse umlilo ngilumeke lokwetindlu lose udvwale ngako. Lapho-ke ngingase ngibone kutsi lomtsimba wakho ungawulalisaphi.

'Ayibe yincane phela Mtfombeni nebakitsi. Ingani ngishito kutsi lidlojwa libukile.'

'Nanyalo ngiyakwesaba kufa kwababe, ngabe angikho kulendzawo yebugcili.' Ukhuluma nje uyasikhihla sililo. Lushawulo naye uyatibonela nje kutsi konakele, kungulapho sekukudze kubuyela emuva.

Asukume LaMagagula aphose umntwana emhlane ngobe abesamehlisile. Acakeke Lushawulo kutsi sekwente njani. Esabe kubuta. Kuloko kuthula eve:

'Kulungile-ke sengiyewubingelela lesitsandvwa sakho njengobe usho,' asho ahlaba umnyango.

'Ngime ...'

'Angifuni mlonyana wakho wena,' sekusho LaMagagula amjaka angakasho naloko labefuna kukusho. Lushawulo abone ingoti lengahle yenteke nangabe ahambe kancane. Avele amlandzele umjako LaMagagula. Batsite bangena edladleni babe seabakanyekanye. Bangena kwathula kwatsi dvu. Inhlitiyo yase ifuna kubhobosa timbambo kuTintfombi ngenca yeluvale lolwase lumphetse. [Emakhasi 45–46]

- 8.1 Nawufundzisa lethekesthi lengenhla ngabe Tintfombi unaso yini sibindzi sekumelana nesento sakhe sekugana indvodza yaLaMagagula? Sekela imphendvulo yakho. (2)
- 8.2 Nguliphi lisiko lesintfu leligcanyiswa ngulethekesthi lengenhla leleyeme endzabeni yonkhe? Sekela imphendvulo yakho ubhekise enovelini. (2)
- 8.3 Kulethekesthi kutsiwa Lushawulo uyabona kutsi sekukudze kubuyela emuva. Kushiwo kuphi emuva lapho abengabuyela khona kute kungabi nalomonakalo lekutsiwa sewentekile etheksthini? (2)
- 8.4 Lushawulo utsi lidlojwa lubukile. Ngabe usicondzise kusiphi sigameko senoveli lesaga? (2)
- 8.5 Kutsiwa LaMagagula abekhuluma abe adzindza sililo. Ucabanga kutsi abekhalelani? (2)
- 8.6 Umyalo webatali udlala indzima lenkhulu etimphilweni tebantfwababo. Sekela leliphuzu ubhekise emphilweni yaLaMagagula lapha kaKhumalo. (2)
- 8.7 Tonto tenina waLushawulo kulenzaba yekuganana kwaboLushawulo naTintfombi ngabe timveta angumlingisi lophilako yini nobe umlingisi longaphili nasimcatsanisa nalokwenteka emimangweni lesiphila kuyo? Chaza. (2)
- 8.8 Ngumuphi umlingisi losicaba emkhatsini waLaMagagula naLushawulo? Sekela imphendvulo yakho ubhekise encwadzini. (2)
- 8.9 Kulesinye sikhatsi kubeketela kunemvuzo ekugcineni. Hlatiya leliphuzu ulibhekise kumunye webalingisi labaphambili kulenoveli. (2)
- 8.10 Sigameko sekushiswa kwelilonto laLushawulo ngiso lesamveta kutsi abeyinganwa. Sekela lombono ngekubhekisa encwadzini. (2)
- 8.11 Chaza luhlobo lwemlandzi walenoveli nelichaza lalibambako ekusilandziseni ngetigameko tayo. (2)
- 8.12 Ngabe umbhali ulikhetse kahle yini liJozi kutsi kube ngiyo indzawo lapho kwahlala khona boLushawulo naTintfombi? Hlola. (3)

[25]

NOBE

UMBUTO 9: KUBAMBA LETINGELAKO – DE Nkosi

Bhala indzabambhalo ngekutselelana emanti kwetigameko letilandzelako talenovelini.

- Kufuna indzawo yekufundza kwaMphikeleli ekutfufukeni kwendzaba.
- Kufundza ngetinkhanyeti.
- Kutsatsa umhlalaphasi kwaTsabetse.
- Kumenyetelwa kwelukhetfo.

Indzabambhalo yakho ayesekelwe ngekucaphuna enovelini.

Indzabambhalo yakho ayibe nemagama langabi ngaphasi kwe-340 kodvwa angabi ngetulu kwe-390.

[25]**NOBE****UMBUTO 10: IMIBUTO LEMIFISHA****KUBAMBA LETINGELAKO – DE Nkosi**

Fundza lethekesthi lelandzelako bese uphendvula imibuto letawulandzela.

Endleleni abehamba abalisa yedvwa abuye atidvudvute yena ngekwakhe ngekutsi atsi, 'kumnyama lamuhla, kepha kusasa kutawukhanya. Imphilo ilukhuni lamuhla, kepha kusasa itawuba lula. Ngidla imbuya ngelutsi lamuhla, kepha kusasa kumele ngibe sekhatsi kwemhlane nembeleko. Akekho umuntfu lodalelwe kuhlupheka aze afe. Nakimi liyawubalela, ngikhombe ngalosekhatsi.' Wakhuluma tehla tinyembeti. Ubalisa nje uyaphimisela. Uhamba yedvwa endleleni. Kwaba mnyama emehlweni kwesikhashana. Chamu, lijaha lelitihambela lodwana liphethse sikhwama salo lesifana naleso lesiphatfwa bameli basemajajini.

'Sawubona mnaketfu,' kubingelela Matsiya.

'Yebo mnaketfu,' kuvuma Mphikeleli.

'NguMatsiya Nyoni, ummeli lomkhulu wendzawo.'

'Ngiyakwati Matsiya. Ngiyakwati Lusiba.'

'Hawu! Kantsi nguwe Mphikeleli? Nguwe Phekulatikhuni? Bengingakuboni ntsanga, ngiyacolisa.' Bachawulane bobabili bahleke.

Lelijaha lelihlangu naMphikeleli, lijaha lendzawo lelathiwa nguwo wonkhe umuntfu kutsi umcondvo walo uphutsene.

'Ubukeya uphatseke kabi ntsanga, kwente njani?'

'Hhayi akukho lokungiphethse kabi.'

'Khuluma ungesabi ntsanga. Uyati kutsi ngingummeli lomkhulu walendzawo. Bonkhe labanemacala nalabanetinkinga bacatululelwa ngimi.'

'Suka lapha Matsiya! Nguliphi nje licala lelingamelwa nguwe? Ngiyiphi nje inkinga leyase yacatululwa nguwe umhlaba ungaka?'

'Tinyenti kakhulu lengiphumelele kuticatulula. Shano yakho lewunayo, ngikubonise kutsi ngingayicatulula.'

'Kusho kutsi sewugula kakhulu ntsanga?'

'Ngiphile njengasheleni mine. Labanyenti basho njalo batsi ngiyagula kantsi ngiphilile.'

'Uma uphilile Matsiya, ngifuna ungifunise indzawo yekuhlala. Sengindzindze yonkhe lenzawo, angiyitfoli.'

'Asambe nyalo ngikuyise endzaweni lenemakamelo labafuna bantfu labatawuhlala kuwo.'

'Ikuphi leyo ndzawo Matsiya?'

'Yekela kubelesela ngemibuto. Asihambe nyalo sicondze khona.'

Balandzelana boMphikeleli naMatsiya bacondza kulelo khaya. Wefike walitfoli likamelo Mphikeleli, waniketwa tikhiya talo.

Wachubeka nendlela Matsiya ngemuva kwekusita Mphikeleli.

'Kusho kutsi ingcondvo yalendvodza ayikahlangani ngci, angalapheka nangatfoli belaphi bendzabuko nebaseNshonalanga labangaba nesineke sakhe sekumelapha,' kusho Mphikeleli amangaliswa lusito lalutfoli kumuntfu labengamcabangi. Ayihlabi ngakumisa!

[Likhasi 5–7]

- 10.1 Uhlupheka kangaka nje Mphikeli, liphi likhaya lakubo nebakubo? Chaza. (2)
- 10.2 Chaza lesaga lesitsi 'Ayihlabi ngakumisa' ubhekise kuloku lokwenteka kuletheksthi leyincenye yenoveli. (2)
- 10.3 Hlobo luni lweludvweshu lolu lesilubona ekucaleni kwaletheksthi? Usho ngani? (2)
- 10.4 Etigabeni tekutfufuka kwenoveli, letheksthi lengenhla ungayifaka kusiphi? Yini lebangela kutsi uyifake kulesigaba? (2)
- 10.5 Uyavumelana yini nekutsi Matsiya abite Mphikeleli ngeligama lelitsi 'Phekulatikhuni?' Sekela imphendvulo yakho ngalokukulenoveli. (2)
- 10.6 Chaza lini lelibalulekile kulenoveli lebelibanjwe nguTsabetse ngembi kwekutsi ashone? Sekela imphendvulo yakho. (2)
- 10.7 Nawulandzela sakhiwo seNoveli, ngabe lenzaba iyafanela kuba yinoveli? Sekela imphendvulo yakho. (2)
- 10.8 Phawula ngesento saMphikeleli kulenoveli lesifakazela kutsi Matsiya abengalapheka kuphela nabengatfoli belaphi bendzabuko nebaseNshonalanga labebangaba nesineke sekumelapha. (2)
- 10.9 Lesihloko salenoveli lesitsi 'Kubamba Letingelako' ngabe siyifanela kangakanani lenzaba. Chaza. (2)
- 10.10 Catsanisa lenkhulumo yaMphikeleli nesiphetfo salenoveli ngalamagama akhe latsi: 'Ngidla imbuya ngelutsi lamuhla, kepha kusasa kumele ngibe sekhatshi kwemhlane nembeleko.' (2)
- 10.11 Utsi Matsiya yena ungummeli lomkhulu wenzawo. Ngusiphi sigameko lesenta kutsi nobe agula nje kukholweke kutsi vele uyabasita bantfu, ngaphandle kwalesi sekutfolela Mphikeleli indzawo? Chaza. (2)
- 10.12 Phawula ngekubumbana kwebalingisi nengcikitsi yalenoveli. (3)

[25]

SAMBA SESIGABA B: [25]

SIGABA C: UMDLALO

Kulesigaba kunemidlalo lemibili. Wena-ke khetsa ube MUNYE lowufundze eklasini lonyaka uphendvule ngawo.

CAPHELA:

Khetsa emkhatsini WENDZABAMBHALO NEMIBUTO LEMIFISHA kulowo nalowo mdlalo lowufundzile. Kumele uphendvule nobe ngumuphi umbuto ube MUNYE *ngalowo mdlalo*. Uma ukhetse kuphendvula umbuto wendzabambhalo enovelini, uphokelelekile kutsi kulesigaba uphendvule imibuto lemifisha. Uma ukhetse kuphendvula imibuto lemifisha enovelini, uphokelelekile kutsi kulesigaba uphendvule umbuto wendzabambhalo.

UMBUTO 11: KWAHLWA EMINI – JJ Thwala

Etimphilweni tetfu kubalulekile kutsi nangabe sikhetsa bangani singabakhetsi ngenjongo yekufuna kutsi basentele lokutsite emmangweni , kodvwa kufanele sibuke bucotfo babo kute bangasilahlekisi, sitibone sesisetinkhingeni letitawuba nemtselela lomubi emmangweni lesihlala kuwo.

Bhala indzabambhalo ngalesecwayiso ubhekise kulabadlali labalandzelako:

Makhosi

Sifiso

Nkhanise

Sicongo

Indzabambhalo yakho ayesekelwe ngekucaphuna emdlalweni

Indzabambhalo yakho ayibe ngemagama langabi ngaphasi kwe-340 kodvwa angabi ngetulu kwe-390.

[25]

NOBE**UMBUTO 12: KWAHLWA EMINI – JJ Thwala**

Fundza letheksthi lelandzelako bese uphendvula imibuto letawulandzela.

Makhosi: Ngimdza nami nangingaka Nkhanise. Ngiyakwati kusibona simo nasingahambi kahle. Buso baNdondlo akusibo lobu lengibatiko. Buso baMntungwa abusesibo loba lengibatiko. Konkhe loko kudalwa nguwe mnaketfu. Asihlale phasi sibonisane sicedze tonkhe tinkinga letifuna kudala umkhatsi kitsi sobabili. Loku kutawubangela sive sichekeke ekhatsi, kuvuke timphi letingeke tiphele.

Nkhanise Liciniso lelo mnaketfu kutsi singumgogodla wesive. Sive sibuke tsine kuko konkhe lokwentekako. Lokusicabanisako nje kunye: bukhosi.

Makhosi: Babe ukhetse mine kutsi ngibe ngumholi wesive. Inkhosi ikhetsa nome ngumuphi umntfwanayo lefuna abuse sive. Kuba yimfihlo yayo kutsi imkhetseleni lowo mntfwana.

Nkhanise Babe ukukhetse njani wena ngobe awusuye lomdzala lapha ekhaya?

Makhosi:	Kuyimfihlo yakhe leyo tsine lesingayati. Nguye longasinika imphendvulo levakalako.
Nkhanise	Kusasa utawube ubekwa esikhundleni sebukhosi. Ubekwa nje inhltiyo yami inemahlwili. Noko-ke akukho lengingakwenta njengobe kusincumo sababe.
Makhosi	Sikhulu sikhundla lotasiphatsa embusweni lotawucala kusasa Nkhanise. Ngeke ngikulahle nobe sekunjani. Kulahla wena kutawube kusho kutsi ngilwa nemadloti. Asibambisane sichubeke lapho babe ashiye khona. Live liba live lelithubekako ngenkhosi netindvuna. Embusweni lomusha ngifuna ube sedvutane nami. Sitasihola lesive nasibumbene saba yimbokodvo. Nasehlukene kutawuba netinkinga letinyenti. Emadloti atasifulatsela.
Nkhanise	Ngiyetsembisa mnaketfu sitawubambisana, kodvwa sento sababe ngeke sikudale kuthula emoyeni wami.
Makhosi	Ngiyjabula kuva kutsi sitawubambisana. Kukhona tintfo loye utemukele ungatemukeli nangabe uphila kulomhlaba lohlabako.
Nkhanise	Liciniso lelo mnaketfu. Kukhona lesiye sikudle kulumela. Wo hhe, kwentekani ngami mine: Mbabatane yetiganga, Msobo longavutfwa, Mchamuk' endle njengembodla

[Likhasi 82–83]

- 12.1 Phawula ngalamavi aMakhosi ekutsi, '*Emadloti atasifulatsela*' ubhekise esiphetfweni salomdlalo (2)
- 12.2 Mfihloni lena leshiwo nguMakhosi kulenkhumalo yakhe letsi, 'Kuba yimfihlo yayo kutsi imkhetseleni lowo mntfwana.' (2)
- 12.3 Lenye imbangela yekubhebhethseka kwentondvo nebutsa emimangweni, kutsatselana tintfombi nobe emajaha. Humusha lombono ubhekise kuNkhanise naSifiso. (2)
- 12.4 Umbhali walomdlalo ubiketele siphetfo sawo ngemaphupho. Chaza lombono ubhekise emdlalweni. (2)
- 12.5 Emmangweni sibocaphela kutsi nangabe ugubhela umuntfu umgodzi kutsi kungene yena, kungenteka kutsi kulowo mgodzi kungene wena. Hlatiya leseccwayiso ubhekise kusinye setigameko letisemdlalweni. (2)
- 12.6 Caphuna emavi aNkhanise kuletheksthi lengenhla lekungiwo lacuketse ingcikitsi yalomdlalo. (2)
- 12.7 Ngusiphi sigameko lesakha sicongo (luyutfondzaba) kulomdlalo? Hlatiya. (2)
- 12.8 Kulomdlalo ngabe ngumuphi umdlali lobambe lichaza lekuba ngumcatsi? Sekela imphendvulo yakho. (2)

- 12.9 Humusha lamavi aMakhosi ubhekise esiphethweni salomdlalo.
'Kukhona tintfo loye utemukele, ungatemukeli nangabe uphila kulomhlaba lohlabako.' (2)
- 12.10 Kube Nkhanise walalela teluleko tenina ngabe lomdlalo awuzange utfufuke ute uyofika esiphethweni sawo. Hluta. (2)
- 12.11 '*Ematinyo liguma*'. Humusha lesaga usibhekise etinkhulumeni taNkhanise kuletheksthi lengenhla. (2)
- 12.12 Catsanisa umugca wekugcina etibongweni taNkhanise letikuletheksthi lengenhla nesimo sakhe njengendvodzana yaMkhalelwa. (3)
[25]

NOBE**UMBUTO 13: *UMVUZO* – NS Nzima**

Kubalulekile kutsi etimphilweni tetfu sikhethse bangani labakahle kute singalahleki, sitibone sesilahlekelwa ngulokukhona ngalokungekho. Bhala indzabambhalo ucondzise kulabalingisi labalandzelako:

Batjele
Satile
Mlandzeli
Sakhile

Indzabambhalo yakho ayesekelwe ngekucaphuna emdlalweni.

Indzabambhalo ayibe nemagama langabi ngaphasi kwe-340 kodwa angabi ngetulu kwe-390.

[25]**NOBE****UMBUTO 14: *UMVUZO* – NS Nzima**

Fundza letheksthi lelandzelako bese uphendvula imibuto letawulandzela.

Bhembe	Ungakaphendvuli nje ntfombatane, ngicela Batjele kutsi usitjele ngalokwentiwe ekoteni yesibili. Siloku sikhuluma ngemakota, mine ngati tilimela temnyaka hhayi loku lesikhuluma ngako.
Batjele	Kube yincwadzi yebhizinisi. Ngaphasi kweTemibhalo kufundvwe umdlalo, tindzaba letimfisha; sivivinyo sesibili besicuketse sivisiso, lulwimi neluhlelo kanye neTemibhalo. Ngaphasi kwetemplomo kutsintfwe kutetfula kwase kuba luhlolo lwesigamu semnyaka.

Bhembe:	Kuyo yonkhe imisebenti leyentiwe, imphumelelo yaSatile ayenetisi nani. Njengobe silindzele imphendvulo kuwe Satile, manje ngicela uyigodle kuwe. Hambani madvodzakati sitawubuye sikhulume nani. (<i>Baphume.</i>) Mntolo! Ifuna tsine madvodza lena kutsi siyibukisise, siyihlatiye siphume nesisombululo. Imiphumela yaSatile iphikisana nesimo sakhe.
Fakudze	Ngiyakuva makhelwane kutsi utsi lenkinga ifuna tsine madvodza. Wena uyibona ikuphi inkinga lapha?
Bhambe	Kukhona lokungahambi kahle emphilweni yemntfwana. Inkinga ayikho etifundvweni nakubafundzisi, kepha isemphilweni yakhe. Simo salomntfwana siphikisana nemiphumela etifundvweni takhe.
Fakudze	Asiphume nyalo sicondze kuMshengu siyewuhlala phasi sibonisane. (<i>Kwatsatfwa sikhwama setincwadzi taSatile, kwacondvwa kaShabalala.</i>)
Fakudze/Bhembe	Mshengu! Nine baseMhlongamvula!
Shabalala:	Ngenani Mntolo nawe Mavundla!
Fakudze	Site lapha ngekutewufuna lusito kuwe Mshengu. Sicela usibukele nati tincwadzi temntfwana bese uyasichazela kutsi angasitwa njani etifundvweni takhe.
Shabalala:	(<i>Atibuke, atiphenye ngayinye.</i>) Lengikubonako lapha kutsi umntfwana unenkinga etifundvweni letintsatfu: Lulwimi Lwasekhaya, Telve neTemlandvo. Kuleti letinye letine akwetfusi ngobe usengawaphakamisa emasokisi ente kancono. Lizinga lemisebenti yaSatile liya ngekwehla imihla nemalanga. Sibonga kusukuma kwenu phasi nilandzelele kutsi ngabe kwente njani. Sengatsi bonkhe batali bangalandzelela emfundvweni yebantfwana babo njengobe nenta. (<i>Ukhuluma uloku uyaphenya.</i>)

[Emakhasi: 92–93]

- 14.1 Lenkhulumiswano yalabadlali labakuletheksthi lengenhla iphatselelene namuphi umbiko lowetfulwe nguBhembe naFakudze? Chaza. (2)
- 14.2 Lenkhulumo yalabadlali labakuletheksthi ibumbene kangakanani nengcikitsi yalomdlalo? Hlatiya. (2)
- 14.3 Yini leyabangela kwehla kwemsebenti wetifundvo taSatile nawubhekisa emdlalweni wonkhe? (2)
- 14.4 Inhlanti ifela emantini. Hlatiya lesaga ubhekise esiphetfweni saMlandzeli. (2)
- 14.5 Nakungatsiwa Batjele ungumlingisi losicaba, wena ungakuvuma loko nobe ungakuphikisa? Sekela imphendvulo yakho. (2)

- 14.6 Nawufundzisisa lethekesthi lengenhla, kuloko lokushiwo nguBatjele ngetifundvo tabo, ngabe kukhona yini lokwehlukile kuloko lokwentiwa esikolweni sakho etifundvweni teLulwimi Lwasekhaya? Chaza. (2)
- 14.7 Tetsamelilwati talomdlalo tifundzani ngelichaza lekumele libanjwe batali bebantfwana etikolweni? Hluta ubhekise emdlalweni. (2)
- 14.8 Faka inselelo kulenkhumulo yaBhembe letsi, ' Mntolo! Ifuna tsine madvodza lena kutsi siyibukisise, siyihlatiye siphume nesisombululo.' (2)
- 14.9 Linemba kangakanani leligama lesikolo saboBatjele? Bhala emaphuzu lamabili. (2)
- 14.10 Bhala emaphuzu lamabili ngekuhambelana kwesibekandzaba sesikhatsi naloko lokwenteka emdlalweni. (2)
- 14.11 Phawula ngekubumbana kwesetfulo nesiphetfo salomdlalo, Umvuzo. (2)
- 14.12 Hlatiya kutfutfuka kwesakhiwo salomdlalo, Umvuzo. (3)
- [25]**

SAMBA SIGABA C: 25
SAMBA SAKOKONKHE: [80]